



# परमात्मा ने दुनिया बणाई – अपण कियाँ?




ए से कहाणी है जिस मिन्ज दस्सेरा है कि दुनिया कियाँ बणी थी। परमात्मा ने ए सारी दुनिया ते जि किछ बी इस मिन्ज है, से सब छे दिनां मिन्ज ही बणाई सुटेया थिया। पैल्ले धरती मिन्ज निव्यारा ही थिया ते ए खाल्ली थी, ते इस मिन्ज किछ बी नी थिया बणेरा। अपण, पवित्र आत्मा पाणी रे उप्पर ही मन्डरांदी रैहन्दी थी।




ताँ परमात्मा ने बोल्लेया, “रोसनी होई जाओ”! ते तिस्सी बेल्ले सब जगा रोसनी होई गेई। परमात्मा ने दिक्खेया कि ए रोसनी ता बड़ी छैळ है, ते इसेरा नां तिन्हा ने “दिन” / ”भ्याग” पाई दितेया। परमात्मा ने रोसनी जो निह्यारे का बखरा करी दितेया, ते निह्यारे रा तिन्हा ने “रात” नां रखी दितेया। परमात्मा ने पैल्ले रोज्जे रोसनी बणाई थी।



दुनिया बनाणे रे दूए रोज्जे, परमात्मा ने बोल्लेया कि अम्बर बणी जाओ ते सच्ची धरती रे  
उपर अम्बर बणी गैया।



तरीये रोज्जे, परमात्मा ने अपणे मुँह कने बोली करी ही पाणी कने धरती जो इक दुज्जे का बखरा बखरा करी दितेया। तिन्हा ने धरती रा नां “पृथ्वी” रक्खेया ते कने पाणी रा नां समुंदर रखी दितेया।



ताँ फिरी परमात्मा ने बोल्केया, “पृथ्वी पर नेक बनेके, छोटे बड़े बुट्टे, फुल्ल फाल्ल ते मती सारियाँ बुट्टियाँ उगी पोन”, ते तिथ्याँ ही होई बी गेया। परमात्मा ने दिक्खेया कि जे किछ बी तिन्हा ने बणाएरा है, से ता बड़ा भारी छैळ है लगेया करदा, ते से ए सब किछ दिक्खी करी बड़े खुस होई गे।



दुनिया बनाणे रे चोथे रोज्जे, परमात्मा ने अपणे मुँह कने बोल्क्येया कि “सूरज”, “चाँद” ते कने “तारे” बणी जान ते से बी बणी गे। परमात्मा ने ए सब इधेरे ताँई बणाए कि रोसनी ते निह्यारे कने अपणे आप ही दिन रात होई जान ते मोसम ते कने साल बीतदे जान, जियाँ जे आज्ज कल्ल होया हिन करदे।



पंजमे रोज्जे परमात्मा ने समंदर मिन्ज रैहणे वाळे जीव जन्तू बणाए कने सारे चिह्न पखेरु बी  
बणाए। परमात्मा ने दिक्खेया कि ए सब किछ बडा छैल है।



फिरी छेम्मे रोज्जे परमात्मा ने बोल्लेया, “धरती पर नेक बनेके जानवर फैलती जान”, ते बिल्कुल इयाँ ही होई गेया जियाँ परमात्मा ने बोल्लेया थिया। तिन्हा जानवराँ मिन्ज का किछ जंगली होए, किछ घा खाणे वाळे, किछ बर्फा मिन्ज रैहणे वाळे होई गे। धरती पर इयाँ मते सारे जानवर होई गे। ए सब से ही जानवर हिन जेडे असां जो आज कल एस धरती पर दिस्दे।

परमात्मा ने दिक्खेया कि ए सब किछ बड़ा छैल है लगदा।



ताँ परमात्मा ने बोल्लेया, “अद्य मणू बनाणा चाहिन्दे जेडे जे दिखणे सुनणे जो मेरे ही साँही होन ते तिन्हा मणुआं जो इस धरती पर ते कने इस पर रैहणे वाळे सबनी जानवराँ पर पूरा अधिकार होणा”।



ताँ परमात्मा ने थोड़ी करी मिट्टी लेई, ते तिस कने इक मणू बणाया, कने तिस मिन्ज “साह” (सॉसें/Breath) पाई दिते। इस मणू रा नां “आदम” थिया। परमात्मा ने इक बगीचा बणाया, जिस मिन्ज आदम रेई सको, ते कने तिस जो तिस बगीचे मिन्ज रखेया कि आदम तिस बगीचे री देख भाल बी करदा रेह।



बगीचे रे मन्झाट्टे जणे परमात्मा ने दो खास किस्मे रे बुट्टे लाए तिन्हा मिन्ज का इक “जीआणे वाळा बुट्टा” (जीवन का पेड़/Tree of Life) थिया ते दुज्जा बुट्टा “खरे बुरे री पछियाण कराणे वाळा” थिया।

परमात्मा ने आदम जो बोल्लेरा थिया, कि तू इस बगीचे मिन्ज का जिस मरजी बुट्टे का फाळ खाणा चाँगा, से खाई सकदा, अपण जेडा जे खरे बुरे री पछियाण कराणे वाळा बुट्टा हैं, तिसेरा फाळ कदी मत खांदा। अगर तू इस बुट्टे रा फाळ खांगा, ता तैं मरी जाणा।



फिरी परमात्मा ने बोल्लेया, “आदम किल्ला रैहन्दा, ए ता खरी गाल्ल नी है”। अपण धरती मिन्ज इदेया कोई बी जानवर नी थिया, जेडा जे आदम रे सोग्गी ते तिस कने मिलि जुलि करी रेई सको।



इधेरे ताँई परमात्मा ने आदम जो घणी निन्दरा मिन्ज सुआई दितेया। फिरी परमात्मा ने आदम री इक पसली लेई ते तिस पसली री इक जनानी बणाई दिती ते तिस जो आदम का लेई आए।



जिस बेल्ले आदम ने तिस जो दिक्खेया, ता से बिलणा लगेया, “आखिरकार! ए ता बिल्कुल मेरे ही सांहई हैं! आदम ने फिरी तेस जनानी रा ना “जनानी” पाणा किजोकी ए ता मणू का ही है बणरी” (woman made from man)। इधेरे ही ताँई इय्याँ हुन्दा, कि इक पुतर अपणे माँ प्यो जो छड्डी करी अपणी लाडी कने इक होई करी बखरा लगी पोंदा रैहणा।



परमात्मा ने मनू ते जनानी जो अपणे ही साँई बणाया, ते दिक्खेया कि ए सब किछ बड़ा भारी छैळ है। परमात्मा ने तिन्हा जो असीस दिती कने बोल्लेया, “तुम्हारे मतै सारे निके निके ते पोतरू पडपोतरू होई जान ते कने तिन्हा कने सारी धरती भरी जाओ!” ए सब किछ दुनिया बनाणे रे छेम्मे रोज्जे होया थिया।



जिस बेल्ले सतमाँ रोज आया, परमात्मा अपणा काम्म पैल्ले ही मुकाई बैठेरे थिये। इधेरे ताँई परमात्मा ने इस दिन अराम कितेया। तिन्हा ने सतमे दिन जो “पवित्र दिन” मन्नेया, किजोकी इस रोजजे तिन्हा जो अपणे काम्म का अराम मिलेया थिया। परमात्मा ने इस तरीके कने इस धरती जो ते इस पर जे किछ बी है, से बणाया।